

## Pemandu ambulans pengedar dadah

**SITI ZUBAIDAH ZAKARAYA**  
**2 Mac 2012**

SUNGAI PETANI – Siapa sangka seorang kakitangan kerajaan berkhidmat sebagai pemandu ambulans rupa-rupanya seorang pengedar dadah dikehendaki polis.

Suspek yang sudah berumah tangga dan mempunyai seorang anak berusia tujuh tahun dikatakan terjebak dalam kegiatan itu sejak 2011, akhirnya tumpas apabila ditahan dalam operasi di Jalan Tikam Batu-Kota Kuala Muda, 26 Februari lalu.

Ketua Polis Daerah Kuala Muda, Asisten Komisioner Hashim Ali berkata, suspek berusia 34 tahun itu ditahan sepasukan polis diketuai Inspektor Razak Osman dan 10 anggota narkotik.

“Suspek cuba melarikan diri ketika menunggang motosikal jam 8 malam kejadian, namun berjaya diberkas.

“Hasil pemeriksaan tempat letak barang terdapat lima ketulan ganja seberat 4.756 kilogram dengan anggaran nilai sebanyak RM13,000.

“Suspek, seorang lelaki bekerja sebagai pemandu ambulans Hospital Pulau Pinang ditahan reman sehingga 4 Mac untuk siasatan,” katanya.

Dalam perkembangan sama, katanya, pada 29 Februari lalu jam 11.15 pagi, satu tangkapan lagi dibuat di tepi jalan Taman Sutera, Sungai Petani ke atas seorang remaja berusia 17 tahun.

Menurutnya, sepasukan polis bersama seorang pegawai dan 12 anggota menahan seorang remaja lelaki memiliki lapan pekuk plastik lut sinar berisi serbuk dan ketulan dadah disyaki heroin seberat 15 gram beranggaran nilai RM500.

“Dengan penangkapan itu, pasukan polis sama telah dibawa ke Jalan Sekerat, Sungai Petani dan berdasarkan intipan telah menahan seorang penganggur berusia 27 tahun sedang membungkus sesuatu dipercayai dadah,” katanya.

Beliau berkata, polis menemui 43 plastik lut sinar serbuk dan ketulan dadah disyaki heroin seberat 411 gram dan harga pasaran dianggarkan bernilai RM8,500.

Katanya, sepanjang 2011 sebanyak 91 kes melibatkan 115 pengedar ditangkap di bawah Seksyen 39 B dan Seksyen 39 A (2) Akta Dadah Berbahaya 1952 yang membawa hukuman gantung sampai mati atau penjara seumur hidup.

“Sepanjang 2011 juga, polis membuat tangkapan sejumlah 2,056 penagih melibatkan 70 peratus adalah Melayu.

“Bermula 1 Januari sehingga 29 Februari 2012 pula, lima orang telah ditangkap di bawah Seksyen 39 B di mana siasatan masih diteruskan dan jika sabit kesalahan boleh dijatuhkan hukuman mati mandatori,” katanya.

*[www.sinarharian.com.my](http://www.sinarharian.com.my) tidak bertanggungjawab di atas setiap pandangan dan pendapat yang diutarakan melalui laman sosial ini. Ia adalah pandangan peribadi pemilik akaun dan tidak semestinya menggambarkan pandangan dan pendirian kami.*